

DIDZA' GUSÓL-LĒ'Ē PABLO LUYÚ GALACIA

Ruzúajë' Pablo quégaca bönachi luyú Galacia

1 ¹ Neda', Pablo, naca' gubáz queë' Cristo. Biti' gula'söl-la' bönachi neda'. Jesucristo caz gusól-lë'ë neda', en nunë' Xúziru' Dios tu zxön Lë'. Lë' busubanë' Jesús lu yöl-la' guti. ² Ruzúaja' queéli' lu guichi ni, libí'ili', yugu' cö' bönachi tu'dubi queë' Cristo luyú Galacia. Núngaquië' yugu' bóchi'ru' ni tu zxön neda'. ³ Rinábida' Xúziru' Dios, enca' Xanru' Jesucristo uzá' ládxë'ë queéli', en gunë' ga soa dxi icja ládxi'do'oli'. ⁴ Jesucristo caz budödi cuinë' lu yöl-la' guti tu' nözi dul-la' nabága'ru' para busölé' rë'u lu le naxihui' raca dza ni zóaru' na'a. Benë' caní tu' naca ca ré'ëni quézinë' Xúziru' Dios. ⁵ ¡Gácatica'sö queë' Dios yöl-la' ba! ¡Ca' caz!

Tuz naca le rinné dxi'a queë' Jesucristo

⁶ Rubánide'eda' ca runli', rucá'anatëli' Dios. Lë' bulidzë' libí'ili' para guéquili' queë' tu' nözi le ruzá' ládxë'ë Jesucristo queéru', ate' na'a ré'ënili' si' ladxi' ná'ali' tu le rinné dxi'a izá'a. ⁷ Le nácatë bití' ca' zoa ia'tú le rinné dxi'a pero ruá'a caní didza' tu' nacu'ë bönni' tu'tsë'ë libí'ili', en té'ënë' ulu'tsë'ë le rinné dxi'a queë' Cristo. ⁸ Channö zoa nu gun ba nalí que tu le rinné dxi'a le cabí naca tuz ca naca lë na' bentu' ba nalí que loli' libí'ili', rinábida'-në' Dios udxíë' dö' nu na' run caní. Ral-la' udxíë' neda' dö' channö guna' caní, en channö gunë' caní tu gubáz queë' Dios zë'ë yehua' yubá, Dios caz udxíë' ca' lë' dö'. ⁹ Chigunná caza' caní zí'alö, ate' na'a rnnía' caní leyúbölö: Channö zoa nu gun ba nalí que tu le rinné dxi'a le cabí naca tuz ca naca lë na' chiguzxí' ladxi' ná'ali', rinábida'-në' Dios udxíë' dö' nu na'.

¹⁰ ¿Réquitseli' ré'ënda' cú'uli' neda' yöl-la' zxön cate' ru'a caní didza'? ¡Biti' ca'! Ré'ënda' urúaja' tsahui' lahuë' Dios. ¿Réquili' ré'ënda' uzaca' baládxí'lengaca bönachi neda'? La'tu' ré'ënda' uzaca' baládxí'lengaca bönachi neda', bití' gaca' huen dxin queë' Cristo.

Naca böáquië' Pablo bönni' gubáz queë' Cristo

¹¹ Ral-la' inózili' lë ni, böchi' zána'do'. Le rinné dxi'a na' runa' ba nalí que bití' gulén icja lo ládxi'da'ahuiguequi bönachi. ¹² Cuntu nu bönni' budödë' lu na'a le rinné dxi'a na', en calëga nu bönni' busédinë' neda' le. Jesucristo caz buzéajni'inë' neda' ca naca le rinné dxi'a queë'.

¹³ Chibiyón quézili' ca na' ben caza' neda' zí'atëlö cate' ni' nazí' lu na'a ca tequi le bach Dios bönni' judío. Nózili' ca bena', yenni' gudxía nahua' bönachi queë' Dios ta'yija ladxi' Cristo, en gú'unda' usulu usunítia' léguequi. ¹⁴ Lu le tequi le bach Dios bönni' judío, guyépisëtëra' neda' ca

lá'tu'biqui' yúgu'të luzá'a bönni' judío yú'ugaquië' iz ca yu'a neda', tu' guzxi'rö ladxi' na'a ca léguequi le bulu'dödë' xuz xtó'oru' loru' ca tun cazë'. ¹⁵ Caní bena' neda', pero tu' náquië' dxi'i ladxi' Dios, guró cazë' neda' zí'atëlö ca gulja', ate' bulidzë' neda' para guna' xichinë'. ¹⁶ Ní'irö, cate' gú'uni quézinë' Dios, benë' ga núnbë'a-në' zxí'inë', en gusöl-lë'ë neda' tsöjena' libán que le rinné dxi'a ca naca queë' Lë' lógaca bönachi izá'a. Cate' benë' caní, biti' yödilja' nu naca bönachi nu usedi neda'.

¹⁷ Cabí guyija' yödzö Jerusalén para tsöyúa' nupa ni' nácagaca bönni' gubáz queë' Cristo zí'alö ca neda', pero guyija' luyú Arabia, ate' gudödi ni' böja' yödzö Damasco.

¹⁸ Caní guca, chigudödi tsonna iz cate' ni' guyija' yödzö Jerusalén, yöyúa'-në' Pedro, ate' bugá'analena' lë' idú ca chidá' gubidza. ¹⁹ Tsanni ni' zoa' ni' biti' ca' bilé'eda' ia'turë' bönni' gubáz queë' Cristo, pero tuzë' Jacobo, bönni' böchë'ë Xanru' bilé'eda'. ²⁰ Didza' ni' ruzúaja' queëli' lu guichi nácatë. Ni'a queë' Dios biti' ca' rizí' yë'a.

²¹ Gudödi ni' guyija', gudöda' yugu' yödz luyú Siria, en luyú Cilicia. ²² Yugu' dza ni' biti' núnbë'gaquië' neda' böchi'ru' tu'dubë' queë' Cristo gapa naca luyú Judea. ²³ Gula'nózzisinë' lë na' gúla'guixjö' quia' ia'zica'rö bönachi, gula'nná: "Bönni' na' gudxía nahuë' rë'u zí'alö, runë' libán na'a que le reja ládxi'ru', lë na' gú'unë' usulu usunítië'." ²⁴ Caní guca, gula'gu'ë yöl-la' ba Dios tu' nözda' neda'.

Bönni' gubáz queë' Cristo guzxi' lu ná'agaquië' Pablo

2 ¹ Cate' chigudödi chidá' iz, guyéajlena' Bernabé, en budxina' yödzö Jerusalén. Guchë'a-bi' Tito, dzágabi' neda'. ² Guyija' ni', en bë'lena' didza' tsölá'alö bönni' ni' yu'u lu ná'agaquië' dxin queë' Cristo, ate' gudíxjöi'ida' légaquië' ca naca libán runa' que le rinné dxi'a lógaca bönachi izá'a. Caní bena' tu' gú'unda' cabí ugá'ana nítisö dxin na' chibena', enca' dxin ni runa' na'a. ³ Sal-la' nácabi' Tito, bi'i luzá'a, bi'i griego, biti' gulunë' bönni' ni ga irugu lu xpéla'bi' lë na' naca bë' bönachi queë' Dios ca tun cazë' bönni' judío. ⁴ Le nácatë gula'cuá' bal-la bönachi ni', nupa ni' ta'zì' yë', ta'ná nácagaca böchi'ru', ate' gulë'ëni ilún ga irugu lu xpéla'bi' Tito lë na' naca bë'. Yugu' bönni' ni núnagaquië' tu zxön rë'u pero tu'yusë' ca runru' para iléquibe'enë' ca nuláru' lu yöl-la' unná bë' que le rinná bë' xibá queë' Moisés tu' nácaru' tuz len Jesucristo. Gulë'ënë' ilunë' ga huóácaru' leyúbölö huen dxin tsaz lu xibá na'. ⁵ Biti' ca' bë'tu' légaquië' lataj. Caní bentu' para gun chí'itu' le nácatë que le rinné dxi'a para gaca uzí'ili' xibé le rinné dxi'a na'.

⁶ Yugu' bönni' ni' réquiru' yu'u lu ná'agaquië' dxin queë' Cristo biti' bi gula'nná be'e neda' le naca cubi, pero biti' ruí'i ládxa'a ca nácagaquië'. Dios biti' ruchi'a rusöröë' rë'u ca tu'chi'a tu'sörö bönachi rë'u. ⁷ Biti' bi gula'nná be'e neda' tu' guléquibe'enë' Dios nudödë' lu na'a dxin queë', para tsöjena' libán que le rinné dxi'a lógaca bönachi izá'a, ca na'

nudödë' lu në'ë Pedro dxin queë', para gunë' libán que le rinné dxi'a lógaca bönachi judío. ⁸ Len yöl-la' huáca queë', Dios benë' neda' bönni' gubáz queë' para usédida' bönachi izá'a, ca na' benë' Pedro bönni' gubáz queë' para usédinë' bönachi judío.

⁹ Jacobo, en Pedro, en Juan, bönni' ni' réquiru' yu'u lu na'agaquië' dxin queë' Cristo, guléquibe'enë' Dios nudödë' lu na'a dxin ni. Que lë ni na' guzxí' ladxi' ná'agaquië' neda', enca' Bernabé, ate' bentu' tuz didza' tsöjentu' xichinë' Dios lógaca bönachi izá'a neda', en Bernabé, ate' légaquië' ilunë' xichinë' Dios lógaca bönachi judío. ¹⁰ Gulá'ta'yusë' lotu' tsönetu' gácalentu' bönachi yechi', ate' lë ni naca tu le ruí'itica'sö ládxa'a runa'.

Ca guca cate' Pablo gudíl-lalenë' Pedro lu yödzö Antiquía

¹¹ Cate' bidxinë' Pedro lu yödzö Antioquía, gudíl-lalena' lë' didza' tu' lë cazë' guchíxinë' ca benë'. ¹² Caní guca tu' zí'atëlö gudágulenë' tsözxón yugu' bönachi izá'a ni'. Benë' caní ga bila'dxinrë' bal-la bönni' dá'gaquië' Jacobo. Ní'irö gusí lahuë' rubíguië', en bíti'rö gudágulenë' tsözxón bönachi izá'a na' tu' gúdxinë' bi ilunë' bönni' na' nazí' lu ná'agaquië' ilunë' ga irugu lu xpéla'gaca bönachi izá'a ca rinná bë' xibá queë' Moisés. ¹³ Ní'irö ia'zícara'rë' bönni' judío ni' ta'yija ládxe'ë Cristo gulunë' tu zxön Pedro ca runë' lu yöl-la' radxi queë', ate' caní guca ga bidxintë gulunë' ga gúdxinë' ca' Bernabé, ate' lë' benë' tu zxön légaquië'. ¹⁴ Cate' bilé'eda' bití' tunë' ca naca le nácatë le rusedi rë'u le rinné dxi'a, gudxa'-në' Pedro lógaca yúgu'të nupa ni' nudúbigaca queë' Cristo, gunnía': "Li' nacu' bönni' judío, pero runu' li' ca túngaca bönachi izá'a, en calëga ca tunë' bönni' judío. ¿Bizx queë' ré'ënu' gunu' ga ilúngaca bönachi izá'a ca tunë' bönni' judío?"

Nulágaca bönachi judío ca na' nulágaca ca' bönachi izá'a

¹⁵ Gudxa' ca' Pedro: "Rë'u ni nácaru' bönni' judío tu' nácagaquië' xuz xiná'aru' judío, en calëga bönachi izá'a, nupa cabí núnbë'gaca Dios.

¹⁶ Nöz quéziru' cuntú nu huóaca tsahui' lahuë' Dios tu' run nu na' tsca rinná bë' xibá queë' Moisés, pero huóaca tsahui' tuzi nu na' reja ladxi' Jesucristo. Lës caní ca' rë'u reja ládxi'ru' Jesucristo para huóacaru' tsahui' lahuë' Dios, en calëga tu' runru' tsca rinná bë' xibá queë' Moisés. Cuntú caz nu huóaca tsahui' lahuë' Dios tu' run tsca rinná bë' xibá queë' Moisés.

¹⁷ Na'a, réquiru' nuhuóacaru' tsahui' tu' reja ládxi'ru' Cristo, pero channö naca bë' nácaru' bönni' dul-la' ca nácagaca bönachi izá'a, ¿innátsaru' runë' Cristo ga runru' dul-la'? ¡Bití' caz! ¹⁸ Channö ruí'i ládxa'a uchisa' le chibuquinja', lë ni naca bë' riguitsja' xibá le gunná bë'ë Dios. ¹⁹ Tu' cabí guca uzó'a didza' xibá na' gunná bë'ë Moisés, guca quia' tsca chinátia'. Tu' caní naca, nulá' na'a lu xibá na' para soa'

ibana', en guna' ca ré'ënë' Dios. ²⁰ Naca quia' ca chigútilena' tsözxón Cristo lë'e yaga cruz ga na' gútië' Lë'. Que lë ni na' calëga neda' ni zoa' nabana', pero Cristo zoë' nabanë' lu icja ládxi'da'ahua'. Tsca naca zoa' nabana' na'a, naca tu' reja ládxa'a Lë' xzí'inë' Dios, Bönni' na' bidxí'inë' neda', en budödi cuinë' lu yöl-la' guti uláz quia' neda'. ²¹ Biti' ré'ënda' uzóa' tsölá'alö le ruzá' ládxe'ë queëru' Dios. Channö huáca huóáquië' tsahui' tu bönni' lahuë' Dios tu' runë' tsca rinná bë' xibá queë' Moisés, ní'irö nítisö gútië' Cristo.”

Le rinná bë' xibá queë' Moisés, en le reja ládxi'ru' Cristo

3 ¹ Libí'ili', tu' canóz, libí'ili', bönni' Galacia. ¿Nuzxi gulú'utsö libí'ili' nëbi para cabirö uzóali' didza' le nácatë? Gate ga rë' buluí'itu' libí'ili' le sa'yéaj ca gútië' Jesucristo lë'e yaga cruz. ² Gudíxjöi'i neda' lë ni. ¿Bidisóalenë' libí'ili' Dios Bö' lá'ayi tu' benli' ca rinná bë' xibá queë' Moisés o tu' guyija ládxi'li' le rinné dxi'a biyónili'? ³ ¿Nacxi guca nácali' tu' canóz caní? Gusí loli' nácali' bönachi queë' Dios tu' zóalenë' libí'ili' Dios Bö' lá'ayi. ¿Réquitseli' huáca udxí gunli' ga guéquili' queë' Dios rácasö queéli'? ⁴ ¿Guca nítisö guca queéli' yúgu'të lë na' guzxaca' gudí'ili'? ¡Biti' ca' guca caní! ⁵ Cate' Dios risól-lë'ë queéli' Dios Bö' lá'ayi, en ru'ë libí'ili' lataj gunli' yugu' yöl-la' huáca que yehua' yubá, ¿runë' caní tu' runli' ca rinná bë' xibá queë' Moisés o tu' reja ládxi'li' le rinné dxi'a na' biyónili'?

⁶ Lu guichi lá'ayi rnna: Abraham guyija ládxe'ë Dios, ate' Dios gunné' náquië' bönni' tsahui' tu' guyija ládxe'ë Lë'. ⁷ Que lë ni na' ral-la' inózili', nupa na' ta'yija ladxi' Dios nácacaga idú xzí'ini xi'sóë' Abraham. ⁸ Lu guichi lá'ayi ruí'i didza' zí'atëlö ca gunë' Dios, inné' nácacaguië' tsahui' bönni' izá'a ila'yija ládxe'ë Lë'. Que lë ni na' Dios gudíxjöi'inë' Abraham zí'atëlö ca naca le rinné dxi'a, gunné': “Lu në'ë Zxí'ini xi'sú' guna' ga gaca dxi'a quégaca bönachi idutë yödzölió.” ⁹ Caní naca, Abraham guyija ládxe'ë Dios, ate' Dios benë' ga guca dxi'a queë'. Lës caní ca' na'a, Dios runë' ga raca dxi'a quégaca yúgu'të nupa ta'yija ladxi' Lë'.

¹⁰ Nupa na' tu'zxöni ladxi' ulu'huóaca tsahui' tu' túngaca ca rinná bë' xibá queë' Moisés, nabága'gaca xíguia'. Caní naca tu' nazúaj lu guichi lá'ayi, le rnna: “Yúgu'të nupa na' cabí túngaca idutë ca rinná bë' xibá na' nabága'gaca xíguia'.” ¹¹ Na'a, naca bë' cuntú nu huóaca tsahui' lahuë' Dios tu' run nu na' le rinná bë' xibá na', tu' zoa lu guichi lá'ayi le rnna: “Nu na' nuhuóaca tsahui' lahuë' Dios soa ibán tu' reja ladxi' Lë'.”

¹² Ca na' nuhuóaca tsahui' lahuë' Dios nu na' reja ladxi' Cristo nadzá' ca naca que nu na' ruzxöni ladxi' nuhuóaca tsahui' tu' run ca rinná bë' xibá queë' Moisés. Zoa lu guichi lá'ayi le rnna: “Nu na' run idutë ca rinná bë' xibá na' soa ibán tu' run caní.”

¹³ Cristo busölé' rē'u lu le richugu queēru' le rinná bē' xibá na' tu' bē'ē latja nu guchugu queē' uláz queēru'. Caní naca tu' zoa lu guichi lá'ayi le rnna: "Narugu quégaca yúgu'tē nupa na' dá'gaca lē'e yaga." ¹⁴ Caní guca queē' Cristo para gaca gunē' Dios ca na' guzxí' lu nē'ē queē' Abraham, gunē' ga gaca dxi'a quégaca bönachi izá'a lu nē'ē Jesucristo, en para gaca gunē' ga idisóalenē' Dios Bö' lá'ayi rē'u channö uyija ládxi'ru' Lē', ca na' guzxí' lu nē'ē Dios gunē'.

Le rinná bē' xibá queē' Moisés, en le guzxí' lu nē'ē Dios gunē' queēru'

¹⁵ Na'a, böchi' zána'do', uzúaja' queēli' tu le rucudzu' didza', tu le raca queēru'. Cate' chopa bönni' chigulunē' tuz xtídza'gaquiē', en chigulunē' tsutsu didza' na', cuntu nu gaca utsá' didza' na', en cabí gaca nu bi udá' lē'e didza' na'. ¹⁶ Dios guzxí' lu nē'ē bi gunē' queē' Abraham, en que zxí'ini xi'sóē'. Ga zoa lu guichi lē ni, biti' rnna: "Quégaca zxí'ini xi'sú'", le ruí'i didza' que zían bönachi, pero rnna: "Que zxí'ini xi'sú'." Lē ni ruí'i didza' que tuz bönni', Lē' Cristo. ¹⁷ Lē ni na' le ré'ēnda' innía': Dios benē' tuz didza' len Abraham, en guzxí' lu nē'ē gunē' ca na' gunné'. Le nazúaj lu xibá queē' Dios, le benē' Dios tapa gayuá' yu' chi-uruá' iz gudödi ni' cate' gudxē' caní Abraham, biti' gaca ugúa lē na' guzxí' lu nē'ē Dios gunē', en cabí gaca usulu le. ¹⁸ Na'a, channö ral-la' gunru' ca rinná bē' xibá na' para sí'iru' le guzxí' lu nē'ē Dios gunsē', bítirö naca tu le guzxí' lu ná'asē' gunē'. Dios runsē' caní tu' caní guzxí' lu nē'ē bi gunē' queē' Abraham.

¹⁹ Channö caní naca, ¿bizx queē gunná bē'ē Dios xibá na' nazúajgaca lu didza' queē'? Dios gunná bē'ē caní para gaca bē' xíguia' nabága'ru', pero gúcasö caní ga bidxintē dza na' bilá' lahuē' zxí'ini xi'sóē' Abraham na', Bönni' na' guzxí' lu nē'ē Dios gunē' queē' lē na'. Yugu' le gunná bē'ē Dios lu xibá queē', gusól-lē'ē yödzölió ni lu ná'agaquiē' gubáz lá'ayi queē', ate' Moisés budödē' didza' ca nácagaca xibá na'. ²⁰ Biti' naquín nu udödi didza' cate' naca tuz nu run tuz didza', ate' Dios, tuz náquiē'.

Bizx queē gunná bē'ē Dios le zóagaca lu xibá queē'

²¹ Le nazúajgaca lu xibá queē' Dios, ¿ta'dá'gaca lē na' guzxí' lu nē'ē Dios gunē'? ¡Biti' ca! La'tu' gunná bē'ē Dios tu xibá le gaca gun ga sóaru' ibanru' tsaz, ní'rö huáca huöácaru' tsahui' lahuē' Dios channö gunru' ca na' rinná bē' xibá na'. ²² Tsca naca lē na' nazúaj lu guichi lá'ayi, yúgu'tēru' nabága'ru' dul-la'. Caní naca para gaca sí'iru' lē na' guzxí' lu nē'ē Dios gata' queēru' cate' tseja ládxi'ru' Jesucristo.

²³ Zí'atēlō ga bidxín dza gaca tseja ládxi'ru' Cristo, le rnna xibá na' gunná be'e rē'u, ca na' zoa le rinná be'e tu bönni' yu'ē lidxi guíē. Caní guca ga bidxintē dza bilá' lahui gaca huöácaru' tsahui' channö uyija ládxi'ru' Lē'. ²⁴ Caní naca, le nazúaj lu xibá queē' Dios gunná be'e rē'u, lē na' busedi rē'u ca tu bönni' usedi ga bidxintē dza bilá' lahuē'

Jesucristo, para gaca huöácaru' tsahui' lahuë' Dios channö uyija ládxi'ru' Lë'. ²⁵ Na'a, tu' bidxín dza gaca huöácaru' tsahui' channö uyija ládxi'ru' Cristo, bíti'rö inná be'e rë'u lë na' busedi rë'u.

²⁶ Yúgu'tëli' nácali' bi'i queë cazë' Dios tu reja ládxi'li'-në' Jesucristo, en chinácali' tuz len Lë'. ²⁷ Yúgu'të nupa nadílagaca nisa para huöácagaca tuz len Jesucristo, nuhuöácagaca ca náquië' Lë cazë'.

²⁸ Bíti'rö narúaj choplö bönni' judío, en bönni' izá'a, en cabí narúaj choplö bönni' náquië' tsaz huen dxin, en bönni' nazán, en cabí narúaj choplö bönni', en nigula, tu' cate' böácali' tuz len Jesucristo, yúgu'tëli' böácali' ca' tuz len luzá'ali' tuli' ia'tuli'. ²⁹ Na'a, channö néquili' queë' Cristo, nácali' ca' zxí'ini xi'sóë' Abraham, ate' nazí'ili' lë na' guzxí' lu në'ë Dios gunnë' queë' Abraham.

4 ¹ Lë ni le ré'ënda' inná': Tsanni ni ribózábi' tu bi'i' bönni'do' sí'ibi' bi ral-la' gunnë' xúzibi' queëbi', ni' nácabi' bí'ido', en biti' nayépisëtërbí' ca raca que tu nu naca tsaz huen dxin, sal-la' le nácatë nequi queëbi' yúgu'të. ² Tsanni ni' nácabi' bí'ido', nacuá' nupa tun chi' lëbi', en tu'gún dxin le nequi queëbi' ga idxintë dza chinuzóë' xúzibi' queëbi'. ³ Lës caní raca ca' queëru'. Tsanni ni' gúcaru' ca bí'ido', gunná be'e xibá na' rë'u ca raca quégaca bönachi yödzölió ni. ⁴ Cate' bizá'a dza, Dios gusól-lë'ë zxí'ini cazë' ni. Gúquië' zxí'ininu tu nigula ca nácaru' rë'u, en gunná be'e le zoa lu xibá quégaca bönni' judío Lë'.

⁵ Caní guca queë' para guca busölë' nupa na' rinná be'e le zoa lu xibá léguequi, para gaca huöácaru' bi'i queë' Dios.

⁶ Para gaca bë' chinácali' bi'i queë cazë', Dios guchizë' Dios Bö' lá'ayi ládxi'do'oli', ate' Lë cazë' rulidzë' Dios uláz queéli', rnnë': "Xuza'."

⁷ Caní naca, chinácali' bi'i queë' Dios, en bíti'rö nácali' ca yugu' bönni' tsaz nácagaquië' huen dxin. Na'a, tu' nácali' bi'i queë cazë' Dios, Lë cazë' nazí' ladxi' në'ë guequi queéli' le nequi queë' tu' nácali' tuz len Cristo.

Pablo ruí'i ládxë'ë bönni' Galacia ta'yija ládxë'ë Cristo

⁸ Cate' ni' biti' núnbë'ëli'-në' Dios, gúcali' ca yugu' bönni', tsaz nácagaquië' huen dxin, en benli' dxin quégaca budó' néquini. Biti' ca' nácagaca budó' na' Dios. ⁹ Na'a, tu' núnbë'ëli'-në' Dios, o huáca innaru': Tu' núnbë'ë Dios libí'ili', ¿bizx queë ré'ënili' ubí'ili' yugu' lu xibá cané na' cabí nu uzí' xibé? ¿Ré'ënili' huöácali' huen dxin tsaz, en gunli' ca rinná bë' xibá na'? ¹⁰ Rápali' tu ia'tú dza, enca' tu ia'tú beo', enca' tu ia'tú cusu na, en tu ia'tú iz. ¹¹ Rádxida' bi gaca queéli'. ¿Naru' nuhuöáca nítisö dxin bena' para gúnbë'ëli' le nácatë? ¹² Ráta'yuá' loli', böchi' zána'do', gácali' ca naca' neda', nulá' na'a lu na' xibá benë' Moisés. Caní ral-la' gácali' tu' böáca' neda' ca gúcali' libí'ili'. Biti' bi le cabí naca dxi'a benli' quia' neda'.

¹³ Chinóz quézili' bizx queë na' gusí lahua' runa' libán loli' que le rinné dxi'a. Bena' libán ni' tu' güí'ida'. ¹⁴ Biti' bucá'anali' neda' cané, en cabí buzóali' neda' tsölá'alö sal-la' bigútili' ca guca yödzöhué' quia' na'. Benli' neda' bal, tuz ca gunli' bal tu gubáz lá'ayi queë Dios, o ca runli' bal Jesucristo caz. ¹⁵ Budzéjalë'ëli' dza ni'. ¿Bizxi guca queëli' tu' cabirö raca caní? Lë ni gaca innía' ca guca queëli': La'tu' huáca gunli', bubéajli' guiój lo quézili', le gúnnali' quia'. ¹⁶ Na'a, éréquili' nuhuóaca' tu nu riléde'e libí'ili' tu' gudxa' libí'ili' le nácatë?

¹⁷ Bönni' ni' tu'tsé'ë libí'ili' tuí'i ládxë'ë libí'ili', pero calëga para gaca dxi'a queëli'. Té'ënë ilunë' ga ucá'anali' netu' para güí'i ládxi'li' légaquië'. ¹⁸ Na'a, naca dxi'a zoa nu ruí'i ladxi' libí'ili', pero tuz channö naca para gaca dxi'a queëli'. Caní ruí'itica'sö ládxa'a libí'ili', en calégasö cate' ni' zóalena' libí'ili'. ¹⁹ Libí'ili', zxí'ina'do'. Ca na' raca queënu nigula chizóa sóabi' bí'ido' queënu, riguí'i rizáca'nu, lës caní riguí'i rizáca'a neda' ni'a queëli' leyúbölö ga idxinrö dza gácali' idú ca náquië' Cristo. ²⁰ Nácaru la' zóalena' libí'ili' na'a para gaca güí'ilena' libí'ili' didza' nadzá'alö, tu' ruúbi ruguí'ilë'ëda' ni'a queëli'.

Le rucudzu' didza' ca guca quégacanu Agar en Sara

²¹ Na'a, libí'ili', nuli' ré'ënili' uzóa cuinli' lu xibá queë Moisés, guli'ná'tsöca' didza' ni gu'a. ¿Catu caz buzé nágali' le rnna xibá na'? ²² Rnna xibá na' caní: gula'cuá'abi' chópabi' bi'i bönni'do' queë Abraham. Tubi' gúcabi' zxí'ininu tu nigula tsaz nácanu huen dxin, ate' ia'tubi' gúcabi' zxí'ininu nigula nazannu. ²³ Zxí'ininu nigula huen dxin na' gúlajbi' lu ni'a lu na' tu bönni' tsa talajbi' yúgu'të bí'ido', pero zxí'ininu nigula nazannu na' gúlajbi' tu' guzxí' lu në'ë Dios gunë' ga gálajbi'. ²⁴ Lë ni naca ca tu le rucudzu' didza'. Ca guca quégacanu chópanu nigula ni sa'yéaj ca naca chopá didza' Dios bénlenë' bönachi. Tu didza' na' naca le buzóë' Dios lu guí'a Sinaí, le sa'yéaj lë na' guca queënu Agar. Nupa na' rinná be'e xibá na' léguequi, nácacaca ca zxí'ininu Agar, en nácacaca ca huen dxin tsaz lu xibá na'. ²⁵ Le gúcanu Agar na' sa'yéaj ca' ca naca guí'a Sinaí na' le zoa luyú Arabia, en sa'yéaj ca' ca naca yödzö Jerusalén na'a dza, tu' naca yödzö na' ca tu bönni' tsaz náquië' huen dxin tsözxón len nupa nacuá' lu yödzö na'. ²⁶ Jerusalén na' zoa yehua' yubá nazán, ate' rë'u ni nácaru' bönachi uládz que yödzö ni'. ²⁷ Nazúaj lu guichi lá'ayi le rnna:

Budzeja, nigula huödx, cabí nacuá' zxí'inu'.

Lu yöl-la' rudzeja quiu' guródxí'a,
sal-la' catu caz guca quiu' le riguí'i rizáca'nu nigula
chizóa sóabi' bí'ido' queënu.

Budzeja tu' sal-la' nusán né'eguequi bönachi li',
gunë' Dios ga ila'yántërö zxí'inu'
ca bi'i queënu nigula zóalennu bönni' queënu.

²⁸ Libí'ili', böchi' zána'do', rë'u ni nácaru' ca gúcabi' Isaac, zxí'inë' Abraham. Nácaru' ca yugu' zxí'ini xi'sóë' Abraham, guzxí' lu në'ë Dios gata' queë'. ²⁹ Dza ni', bi'i na' gúlajbi' ca tála'jbi' yúgu'të bí'ido', gudxía ná'abi' bi'i na' gúlajbi' tu' nözi yöl-la' huáca queë' Dios Bö' lá'ayi. Lës caní raca ca' queëru' na'a, ta'bía no bönachi yödzölió ni rë'u. ³⁰ ¿Bizxí rna le zoa lu guichi lá'ayi? Caní rna: “Gurú'una-nu nigula na' tsaz nácanu huen dxin tsözxón len zxí'ininu, tu' biti' gaca zxí'ininu nigula na' sí'ibi' tsözxón zxí'ininu nigula nazannu le guzxí' lu në'ë Dios guequi queëbi' zxí'ininu nigula nazannu na'.” ³¹ Caní naca, böchi' zána'do'. Biti' nácaru' ca nácabí' zxí'ininu nigula na', tsaz gúcanu huen dxin, pero nácaru' ca zxí'ininu nigula nazannu na'.

Guli'gún chi'i cuinli', ugá'anali' lu yöl-la' nazán

5 ¹ Chinazanru' tu' busanë' Cristo rë'u. Guli'sóa tsutsu channö, ugá'anali' lu yöl-la' nazán na'. Biti' uzóa cuinli' leyúbölö lu xibá queë' Moisés para cabí gácali' ca tu bönni', tsaz náquië' huen dxin.

² Buli'zé nágali' neda'. Neda', Pablo, rea' libí'ili', channö ruí'ili' lataj nu ichugu lu xpéla'li' ca rinná bë' xibá na', biti' ca' uzí'ili' xibé le benë' Cristo. ³ Leyúbölö ré'ënda' guía' núti'tës bönni' ru'ë lataj nu ichugu lu xpélë'ë caní, run bayudxi gunë' idutë ca le rinná bë' xibá queë' Moisés.

⁴ Nuli' réquili' huóacali' tsahui' lahuë' Dios tu' runli' ca rinná bë' xibá na', chibulá'alenli'-në' Cristo. Chibusán ná'ali' le ruzá' ládxë'ë Dios queëru'. ⁵ Rë'u ni ruzxöni ládxi'ru' huóácaru' tsahui' lahuë' Dios ni'a que yöl-la' huáca queë' Dios Bö' lá'ayi tu' reja ládxi'ru' Cristo. ⁶ Channö nácaru' tuz len Jesucristo, biti' bi run channö narugu lu xpéla'ru' ca rinná bë' xibá na' o channö cabí narugu caní lu xpéla'ru'. Le run bayudxi naca tseja ládxi'ru' Cristo, le run ga idxí'iru' luzá'aru'.

⁷ Dxí'ado' guca ca gusí loli' runli' dza ni'. ¿Nuzxi ben ga bucá'anali' le nácatë? ⁸ Biti' benë' Dios, Bönni' rulidzë' libí'ili', ga benli' caní. ⁹ Biti' gal-la ládxi'li' lë na' rna: “Láti'sö cúa zi que yöta xtila ruhuóázx idutë cúa ga nayú'u cúa zi na'.” ¹⁰ Tu' nácaru' tuz len Xanru', runa' löza ca naca queéli', sa' ládxi'li' tuz ca rizá' ládxa'a neda', ate' Dios gun zi'ë bönni' na' rutsé'ë libí'ili', núti'tës nu naca bönni' na'.

¹¹ Ca naca quia' neda', böchi' zána'do', nacuá' nupa ta'nná rusédida' bönachi ral-la' irugu lu xpéla'guequi ca rinná bë' xibá queë' Moisés. Channö runa' caní, ¿bizx queë ta'bía nahuë' bönni' judío neda'? La'tu' rusédida' caní, cuntú nu ilé neda' tu' runa' libán ca gútië' Cristo lë'e yaga cruz. ¹² Ca naca que nupa ni' tu'tsá' libí'ili', té'ëni irugu lu xpéla'li' lë na', nácöru la' ila'chugu tsaz cúnguequi.

¹³ Ca naca queéli', böchi' zána'do', Dios bulidzë' libí'ili' para gácali' bönachi nazángaca. Biti' ugunli' dxin yöl-la' nazán na' para gunli' ca rizësö ládxi'li', pero para gunli' dxin que luzá'ali', tuli' ia'tuli', tu' nadxí'ili' luzá'ali'. ¹⁴ Yúgu'të le rinná bë' xibá queë' Dios rusudxín nu na'

run ca rinná bë' xibá na' rnna: "Ral-la' idxí'inu' luzó'o ca nadxí'i cuinu'." ¹⁵ Channö rizí' quídza'li' luzá'ali' tuli' ia'tuli', runli' ca tunba' böa' guí'a sínia', táguya'aba', en táguba' luzá'aba'. Buli'yú tsate' usulu usunítili' luzá'ali' tuli' ia'tuli'.

**Le runru' lu yöl-la' bönáchisö queéru', en le runru'
len yöl-la' huáca queë' Dios Bö' lá'ayi**

¹⁶ Lë ni na' rea' libí'ili': Guli'güí' latja inná bé'enë' libí'ili' Dios Bö' lá'ayi, ate' ní'irö bítirö gunli' ca rizësö ládxi'ili' lu yöl-la' bönáchisö queé'li'. ¹⁷ Yugu' le rizé ládxi'ru gunru' lu yöl-la' bönáchisö queéru' biti' röjlöz le ré'enë' Dios Bö' lá'ayi gunru', ate' lë na' ré'enë' Dios Bö' lá'ayi biti' röjlöz le ré'eniru' gunru' lu yöl-la' bönáchisö queéru'. Chopa ni, biti' röjlözgaca, en que lë ni na' biti' gaca gunli' ca ré'ëni quézili'.

¹⁸ Channö ruí'ili' lataj inná bé'enë' Dios Bö' lá'ayi libí'ili', bítirö inná be'e xibá queë' Moisés libí'ili'.

¹⁹ Naca bë' le tun bönachi lu yöl-la' bönáchisö quéguequi.

Tun dul-la' le riguitsaj xibá que yöl-la' nutsaga na', enca' dul-la' le lë'ë.

Tun yugu' le naxihui', en yugu' le catsahui'.

²⁰ Téquiguequi le bach budó' néquiniguequi.

Tun yöl-la' gudzá'.

Tu'dí'i luzé'eguequi, en ta'díl-lalen léguequi.

Tu'zxé'e luzé'eguequi, en ta'lé nupa na', en tu'huídi'.

Ta'ruáj choplö, en tu'béaj tsölá'alö nupa dá'gaca léguequi.

²¹ Ta'zé ladxí' le dë que luzé'eguequi, en ta'guilaj xíguia'.

Ta'zudxi, en tagu lë'e.

Tu'dödi bë' ca túnguequi.

Le zían le caní túnguequi. Neda' ruxösa' ládxi'li' na'a para cabí gunli' caní ca na' buxösa' ládxi'li' zí'alö, rnní'a': Nupa túngaca caní biti' ca' ila'deli' ila'yú'u ga na' rinná bë'ë Dios.

²² Channö zóalen Dios Bö' lá'ayi rë'u runru' caní:

Nadxí'iru' luzá'aru'.

Rudzeja ládxi'ru'.

Zoa dxi ládxi'do'oru'.

Ribózaru' zxön ladxí'.

Ruí'i ládxi'ru' luzá'aru'.

Nácaru' dxi'i ladxí'.

Rusudxinru' xtídza'ru'.

²³ Nácaru' nöxaj ladxí'.

Rinná be'e cuinru'.

Biti' ca' gunná bë'ë Moisés rë'u para cabí gunru' yugu' le caní. ²⁴ Nupa néquiguequi queë' Cristo bítirö tun ca té'ëni quez, en cabí tun le ta'zësö ladxí' lu yöl-la' bönáchisö quéguequi. ²⁵ Dios Bö' lá'ayi runnë' yöl-la'

na'bán queéru'. Lë' cazë' ral-la' inná bé'enë' rë'u ca naca yúgu'të le runru'.

²⁶ Biti' ral-la' gun ba zxön cuinru', en cabí utsá'aru' luzá'aru', en cabí uzxé'aru' luzá'aru' turu' ia'turu'.

Ral-la' gácalenru' luzá'aru' turu' ia'turu'

6 ¹ Na'a, böchi' zána'do', channö ilé'eli' runë' dul-la' tu bönni' böchi'li', nuli' zóalenë' Dios Bö' lá'ayi libí'ili', ral-la' gunli' ga ubí'i ládxë'ë bönni' na', pero run bayudxi gunli' caní lu yöl-la' nöxaj ladxi' queé'li', en uyú cuinli' tsate' cu'u tu' xihui' libí'ili' nöza dul-la'.

² Guli'gácalen luzá'ali' tuli' ia'tuli' tsca naca yuá' nabága'li'. Channö gunli' caní uzóali' didza' le gunná bé'enë' Cristo rë'u.

³ Channö zoa nu réqui chinadelí' yöl-la' nayépisë, en bití' bi nadelí' nu na', nu ni na' rizi' ye'e la' cuinsi. ⁴ Tuhuéaj tuhuéajë' bönni' ral-la' uchi'a usöróë' que le runë'. Ní'irö channö urúajë' dxi'a, huáca gun ba zxön cuinë' ni'a que le chinunë', en bití' gun bayudxi uyúë' ca núngaca ia'zíca'rö bönachi channö ba benrë' dxi'a o cabí. ⁵ Tuhuéaj tuhuéajë' bönni' ral-la' gu'ë le nusubáguë'ë Dios lë'.

⁶ Channö zoa nu rusedi libí'ili' ca naca le rinné dxi'a, ral-la' unódzjali' nu na' rusedi libí'ili' lati' que yúgu'të le do' dë queé'li'.

⁷ Bití' si' ye'e cuinli' tu' cuntú nu gaca si' ye'e Dios. Ulápali' tsca naca le rázali'. ⁸ Channö le rázali' naca yugu' le runli' ca rizësö ládxí'li' lu yöl-la' bönáchisö queé'li', le ulápali' gaca yöl-la' guti. Channö le rázali' naca yugu' le runli' ca raza ládxë'ë Dios Bö' Lá'ayi, ulápali' le gunnë' Dios Bö' lá'ayi queé'li', le naca yöl-la' na'bán idú. ⁹ Caní naca, bití' ral-la' huöa ládxí'ru' gunru' le naca dxi'a, tu' channö cabí huöa ládxí'ru', idxín dza uláparu'. ¹⁰ Que lë ni na', bátati'tës gata' queéru' lataj, ral-la' gunru' le naca dxi'a quégaca yúgu'të bönachi, en le naca lo, ral-la' gunru' caní quégaca böchi' zanru' ta'yija ladxi' Cristo.

Le buzúajë' Pablo lu guichi ga ruúdx

¹¹ Buli'yú cate' bach didza' ni ruzúaja' lu guichi len na' cuina'. ¹² Nupa na' té'ëni ilún ga irugu lu xpéla'li' ca rinná bë' xibá queë' Moisés, túngaca caní para ulu'ruáj dxi'a lógaca bönachi, en cabí bi ilún quéguequi tu' túngaca libán ca gútië' Cristo lë'e yaga cruz. ¹³ Yugu' bönni' na' ta'zí' lu ná'agaquië' le narugu lu xpéla'gaquië' ca rinná bë' xibá queë' Moisés, bití' tu'zóë' didza' idutë ca rnna xibá na'. Té'ëne' ilunë' ga irugu lu xpéla'li' para gaca ilún ba zxön cúngaquië' tu' ta'nná bé'enë' libí'ili' para irugu lu xpéla'li' caní. ¹⁴ Ca naca quia' neda', cú'usa' yöl-la' ba le benë' Xanru' Jesucristo cate' gútië' lë'e yaga cruz. Tu' nözi le benë' Cristo lë'e yaga cruz, yugu' le dë yödzölió ni naca quia' ca tu le chinati, bití' ruí'i ládxa'a le, ate' neda' naca' quégaca bönachi yödzölió ni ca tu bönni' nati, bití' tuí'i ladxi' neda'. ¹⁵ Channö nácaru' tuz len

Jesucristo, biti' bi run channö narugu lu xpéla'ru' ca rinná bë' xibá na' o channö cabí narugu lu xpéla'ru' caní. Le run bayudxi naca gácaru' bönachi cubi niu' lë'e ládxi'do'oru'. ¹⁶ Yúgu'të bönni' na' tunë' ca rinná bë xibá runa' ni, en yúgu'të bönni' na' néquiguequinë' queë' Dios, rinábida'-në' Dios gunë' ga soa dxi ládxi'do'gaquië', en huéchi' ládxië' légaquië'.

¹⁷ Na'a zë lo, cuntú nu bönni' ral-la' utsé'ë neda', tu' nácagaca bë' butsóa zóagaca lu xpéla'a naca' huen dxin queë' Xanru' Jesús.

¹⁸ Na'a, böchi' zána'do', rinábida'-në' Xanru' Jesucristo uzá' ládxië'ë queéli' yúgu'tëli'. Ca' caz.